

北京圖書館 編


北京圖書館藏珍本
年譜叢刊



第 183 冊

北京圖書館出版社

□ 北京圖書館 編



北京圖書館藏珍本
年譜叢刊

北京圖書館出版社

第 183 冊

第一八三冊目錄

齋翁自訂年譜	一
侯官嚴先生年譜	一七七
松壽老人自叙	一九九
且頑七十歲自叙	二一一

古人無所謂年譜有之則後人景仰前哲綴緝其言行事跡參比而爲之無自訂者自訂自謬始謬曷爲自訂記一生之憂患示訓子孫乎憂患士之常非也記學問乎學殖薄而無專長粗窺文字而不足離古人自立亦非也記出處乎本於親訓夙無宦情迫而強從前不足三月後不過二年不足記尤非也然則曷爲自訂夫今之世非中國上下五千年絕續之會乎五帝以前史所不能質言者吾不敢知由今日而企五帝之世其國體爲君主則可斷言嬗民主而開天尤非今莫屬也惟君主故更數十年或數百年必有爭爭故預其爭當其爭者千萬人蒙其害而一二最强伯善爭者享其利利至於無饜足而莫之止乃

復有爭此大較也民主啓於法於美亦千萬人不勝一二人專與爭之害而爲此制制此者以減害以平爭爲此善於彼之冀幸我踵而行之十有四年矣散一二人之專爲千萬人所欲之專而爭如故合千萬人之爭附一二人之爭而爭逾甚其故安在一國之權猶鹿也失而散於野則鹿無主衆人皆得而有之而逐之而爭以劇一人捷足而得之則鹿有主衆無所逐而爭以定此雖名法家言而事實如此不可誣也然一人獨有衆之所欲得而又私而不善公諸人則得亦必終失夫私也若何而善公諸人則孟子所謂舜禹之有天下也而不與焉是也世固不能皆舜禹也不能舜禹而欲其公固莫如憲法自清光緒之

季革命風熾而立憲之說以起立憲所以持私與公之平納君
與民於軌而安中國億兆人民於故有而不至顛覆眩亂者也
主革命者目爲助清清又上疑而下沮甲唯而乙否陽是而陰
非徘徊遷延而瀕於漸盡前此遷延徘徊之故雖下愚亦能窺
其微雖上聖不能警之寤謬當其間有一時一地一人一事之
見端而動關全局者往往親見之親聞之當時以爲恨後時則
且以爲不足道然而黃帝以來五千年君主之運於是終自今
而後百千萬年民主之運於是始矣烏乎豈非人哉豈非天哉
謬年二十有二始有日記至於七十歷四十有八年視讀古史
殆易數姓此四十八年中一身之憂患學問出處亦嘗記其大

者而莫大於立憲之成毀不忍舍棄撮爲年譜立身行已本末
具矣系日於年固有事在以供後之作史而論世之君子儻亦
有所取裁民國十四年十二月張謇

菴翁自訂年譜卷上

清咸豐三年癸丑五月二十五日卯時生於海門常樂鎮今敦裕堂前進之西室一歲

余家自先高祖由石港遷金沙場東五里廟河南頭總清嘉慶元年先曾祖卒先祖年裁八歲先祖兄弟三人府君第三家頗溫飽先長伯祖既娶分爨就田於餘中次伯祖不勤農業外出不歸先曾祖母特愛府君幼從學村塾年十六歲時在塾聞母猝病急歸省已噤不能處分後事既葬家日蝕於前嫁長姊之族誘之博覆焉外曾祖東臺耕茶吳聖揆公爲小盜商於金沙場無子止一女習知府君

忠樸被紿家落憐之贅爲壻如子命生子兼祧吳氏時當嘉慶中葉嗣胤日繁慮爲外家累乃遷西亭旋外曾祖亦遷海門常樂鎮兼治小農先祖命先君月走七十里一省視有事則留數日或旬事竟始歸以爲常外曾祖父卒外曾祖母高年獨居聞人稱先母在室之勤孝命先祖父祖母爲先君聘娶而侍外曾祖母申外曾祖命生子後吳先母金氏故與外曾祖母同貫東臺也時爲清道光之季先君始娶於葛生伯兄譽（小名長源）三十年金太夫人生仲兄暮（小名長慶）咸豐元年生叔兄譽（小名長春）三年謇生（小名長泰）十一月先祖卒年六十有六

四年甲寅二歲

葛太夫人生弟警（小名長發）

五年乙卯三歲

七月外曾祖母殷卒年八十有一

六年丙辰四歲

通海大旱蝗蝗自北至作風雨聲輒蔽天日落地積厚二三寸戶外皆滿先君先母指謂此害人物飢民滿道見袖餅噉者輒攫先母雜蠶豆作飯見乞者恒輟箸予之余時能俛檻拾棒擊蝗矣 冬先君始教識千字文

七年丁巳五歲

正月三叔父來知余已識字命背誦千文竟無譌三叔父
喜先君先母亦喜遂命隨伯仲叔三兄入隣塾從海門邱
畏之先生大璋讀命名吳起元名仲兄吳慶華叔兄吳首
梅

八年戊午六歲

仍從邱先生讀 夏大水塾前橋與水平余隨三兄上塾
行後過橋落水邱先生訝少一人亟出視見水涌動伏橋
援之起

九年己未七歲

仍從邱先生讀 七月仲兄與隣兒嬉溺水殤年十歲

十年庚申八歲

仍從邱先生讀 三月先祖母吳卒年六十有四先君治喪於西亭余與叔兄輒據案習字記小帳一族兄挈游城隍廟入後宮神夫婦二偶像坐特高重宇陰闕族兄命揖甫揖坐上筆筒籤筒翻倒作聲余驚而啼道士奔集撫而慰之自是先母戒後勿入廟 先母挈叔兄與余往東臺追薦先外祖母之喪

十一年辛酉九歲

仍從邱先生讀

清同治元年壬戌十歲

仍從邱先生讀

二年癸亥十一歲

自五歲至是七年讀三字經百家姓神童詩酒詩鑑畧千家詩孝經學庸論孟畢始授詩經國風二冊學屬對三四五字非特不知四聲并平仄聲亦不了解先生命屬對法以上下左右晝夜黑白相對如是推類先君見以日懸天上對師所命月沈水底句而喜謂可讀書謀於三叔父明年延師於家是年江南猶陷於寇避地之人時有至者余聞人誦滕王閣序於市募錢久之耳熟問先君曰若豈不以關山難越四語訴苦乎先君頷焉

三年甲子十二歲

八月湘軍克江寧復之 先君於住屋外別治一室室外
有五柳因名仿陶書屋正月延西亭宋蓬山先生效祁授
叔兄五弟與謇三人讀無僮僕灑掃糞除諸役皆三人任
之先生檢視前所讀書音訓句讀多誤令自學庸論孟始
盡易新本授令重讀既背更授自日三十行漸增至六七
十行或百行亦授四聲或就三字經四字鑑千家詩爲說
故事一日先君在塾有武弁騎而過門外者先生舉人騎
白馬門前去命對應曰我踏金鼇海上來先生大喜先君
亦喜甚歸告金太夫人太夫人曰兒誠可喜但勿過譽之

成敗未定也 是年五月先生應歲科連試復病足罷課
幾兩月 六月先君命與叔兄五弟隨傭工鋤棉田草大
苦乃益專意讀書 十一月先生應江南鄉試子璞齋先
生琛獲中先生又爲摒擋諸事計在塾教授不足六閱月
也在塾之日先君必朝夕起居致敬禮

四年乙丑十三歲

三月二叔父卒年四十有六 是時宋先生年五十有八
故患喘夜寐恒短感先君先母於其服食起居忠敬有加
又以上年曠課久爲歉督余益嚴日授生書嘗再量難易
爲多寡讀則抗聲先之讀而諧則稱獎之余兄弟故與同

寢室牀相接即寢寐未熟間問他事或問旦所讀書義若何意愜則次日告先君而稱許是歲讀論孟詩書易孝經爾雅竟學爲五七言詩試帖自二韻至六韻制藝作講首先生每歸必挈與俱亦令至西亭詩社分題作詩或限字爲詩鐘

五年丙寅十四歲

讀禮春秋左傳作八韻詩制藝成篇第一題爲有心哉擊磬乎州試題也先生命先作一破余破磬能傳心心以磬傳矣遂命廣續終篇五月餘東竈民以禁米出江并與鹽商爭蕩之故鄉人推諸生許朝楨爲首抗不遵禁毆傷

州役州移鎮營會緝仍抗門傷營兵兵有墮水死者知州以匪亂報督撫請兵巡撫李鴻章檄提督張紹棠吳慶華統二營臨剿逮許戮焉事解而鄉人之驚惶逃徙徧數十里而月不絕 六月先生以兵警歸未幾病卒時方盛暑先君聞訊即挈余兄弟星夜赴其喪任經紀喪費 先君命至西亭從宋紫卿先生琳讀宿膳其家先生蓬山先生之從子也

六年丁卯十五歲

仍從學於西亭間從璞齋先生問業讀周禮儀禮苦儀禮難讀亦不甚了解余先世祖父由口口相傳爲三姓街張